

आकाशवाणी

खास-खास खबरां:-

- प्रधानमंत्री नरेन्द्र मोदी होर अज्ज तिरुवंतपुरम च केई विकास परियोजनाएं दा शुभारम्भ करगंन। श्री मोदी 3 “अमृत भारत एक्सप्रेस” रेल गड्डियें गी बी रवाना करोआंगन।
- केन्द्र सरकारै मरदमशुमारी दे पैहले गेड़ दरान नागरिकें थमां पुच्छे जाने आहले 33 सोआलें दी सूचि जारी करी दिती ऐ।
- केन्द्र सरकार नेताजी सुभाष चन्द्र बोस हुंदी 129मीं जयंति दे मौके पर अज्जै थमां अंडमान ते निकोबार टॉपुएं पर “पराक्रम दिवस” आले कार्यक्रमै दा आयोजन करा रती ऐ।
- यूक्रेन ते रुस बश्कार संघर्ष गी खत्म करने लेई यूक्रेन- अमरीका ते रुस अज्जै थमां दंडु दिनें दी बैठक च हिस्सा लैगंन।
- ते “बसंत पंचमी” ते “सरस्वती पूजा” दा पर्व अज्ज भारत च धार्मिक उत्साह कन्नै मनाया जा रदा ऐ।

<><><><><><>

PM -Kerala

प्रधानमंत्री नरेन्द्र मोदी अज्ज केरल दे दौरे पर रौहगंन। इस दरान ओह तिरुवंतपुरम च बक्ख-बक्ख विकास परियोजनाएं दा नीह पत्थर रक्खगंन ते किश दा उदघाटन बी करगंन। श्री मोदी इस मौके पर किट्ठ अग्गे भाषण बी देगंन। एह परियोजना- रेल सम्पर्क - शैहरी- आजीविका- विज्ञान ते नमियें काहड्डें- नागरिकें पर आधारित सेवाएं ते उन्नत सेहत सेवाएं सनें प्रमुख खेतरें कन्नै जुड़ी दियां न- जेहडियां समावेशी विकास- तकनीकी- प्रगति ते नागरिकें दे जीवन स्तर च सुधार बक्खी प्रधानमंत्री हुंदे लगातार ध्यान गी दर्शादियां न। प्रधानमंत्री होर 3 अमृत भारत ते इक यात्री ट्रेन सनें 4 नमीं रेल गड्डियें गी इंडी दस्सियै रवाना बी करगंन। शैहरी आजीविका दे जतनें गी तगड़ा बनाने दे मकसद कन्नै श्री मोदी- “पी.एम स्वनिधि” क्रेडिट कार्ड आली बवस्था दा बी शुभारम्भ करगंन।

<><><><><><>

Govt. Census

केन्द्र सरकारें मरदमशुमारी दे पैहले चरण दे दरान नागरिकें थमां पुच्छे जाने आले 33 सोआलें दी सूची जारी करी दिती ऐ। एह चरण पैहली अप्रैल थमां शुरु होआ रदा ऐ। पैहले चरण च घरें दी सूची तयार कीती जाहग- जेहदे लेई हर इक राज्य ते केन्द्र शासत प्रदेश दी तरफा तय 30एं दिनें दी अवधि च अभियान चलाया जाहग। एह चरण 30 सितम्बर तगर जारी रौहग। सर्वेक्षण दे दरान मरदमशुमारी आला अमला घरें दी मालकी दी स्थिति- घर दे इस्तेमाल- फर्श दे छतै च इस्तेमाल समग्री दी किस्म- कमरें दी गिनतरी ते परोआर दे मुखिया दे लिंग दे बारे च जानकारी मंगगंन। एहदे परैन्त घरें दे इस्तेमाल- ओदी स्थिति ते सदस्यें दी गिनतरी दे बारे च जानकारी हासल कीती जाहग। नागरिकें गी उन्दे घरें च उपलब्ध बुनियादी सुविधाएं दे बारे च बी पुच्छेया जाहग। इंदे च पीने दे पानी- बिजली- शौचालय-एल.पी.जी. जां PNG कनेक्शन ते इंटरनेट कनेक्शन वगैरा दे बारे च जानकारी शामिल होग।

<><><><><><>

Parakram Diwas

संस्कृति मंत्रालय- नेताजी सुभाष चन्द्र बोस हुंदी 129 जयंति दे मौके पर अज्जै थमां अंडमान ते निकोबार टॉपुएं पर “पराक्रम दिवस- 2026” दा आयोजन करा रदा ऐ। महान सुतैतरता सेनानी सुभाष चन्द्र बोस हुंदे जीवन ते विरासत कन्ने जुड़ी दियें मुख् भरै दियें 13एं थाहरें पर बी एह उत्सव मनाया जाहग। इस कार्यक्रम च शामिल होने आलें गी अंडमान ते निकोबार टॉपुएं दे व्यंजनें दा अनुभव करने ते उत्थुं दी पारम्परिक दस्तकारियें गी दिक्खने दा मौका मिलोग। एह उत्सव 25 जनवरी तगर चलोग।

<><><><><><>

PM -Netaji

प्रधानमंत्री नरेन्द्र मोदी होरें अज्ज नेताजी सुभाष चन्द्र बोस हुंदी जयंति पर उनेंगी श्रद्धांजलि अर्पित कीती ऐ। सोशल मीडिया दी इक पोस्ट च श्री मोदी होरें आखेया ऐ जे इस ध्याड़े लोक- नेताजी हुंदी दलेरी- मजबूत धेइये ते राष्ट्र दे प्रति उन्दे बेजोड़ जोगदान गी चेता करदे न।

उनें आखेया ऐ जे नेताजी हुंदे आदर्श- औने आली पीढ़िये गी मजबूत राष्ट्र दे निर्माण लेई सदा प्रेरित करदे रौहगंग।

<><><><><><>

Prog. Ann-Valour Day

आकाशवाणी दा क्षेत्रीय समाचार एकांश जम्मू अज्ज 23 जनवरी गी “पराक्रम दिवस” दे मौके पर 25 मिन्टे दी इक विशेष परिचर्चा प्रसारत करने जा’रदा ऐ। दपैहरी 12 बजे प्रसारत होने आहली इस परिचर्चा दा विषे सार ऐ- “दलेरी थमां प्रेरणा- नेताजी हुंदे विचार ते अज्जै दा भारत” । नेताजी सुभाष चन्द्र बोस हुंदी जन्म जयंति दे सिलसिले च हर बरे 23 जनवरी गी “पराक्रम दिवस” दे रूपे च मनाया जन्दा ऐ। इस विशेष परिचर्चा च स्हाड़ी परौहनियां होगंग- जम्मू युनिवर्सिटी च प्रोफैसर शशी प्रभा जेहड़ियां इस विषय पर अपने माहिराना विचार सांझे करगंग। कार्यक्रम दी मेजबानी करगंग स्हाड़ न्यूज एंकर विजय बजाज।

<><><><><><>

Rev. Ukraine –US-Russia Meeting

यूक्रेन दे राष्ट्रपति ब्लादिमीर जेलेस्की होंरे दस्सेया ऐ जे यूक्रेन-अमरीका ते रूस अज्ज ते कल UAE च त्रिपक्षीय बैठक करा रदे न। रूस ते यूक्रेन दे 2022 दे टकराव दे मगरा एह पैहली बारी ऐ जिसलै त्रंऊ मुखे दे प्रतिनिधिमंडल किट्ठे होइयै इस लड़ाई गी खत्म करने बारे चर्चा करगंग। Zelensky होंरे अमरीकी राष्ट्रपति डोनाल्ड ट्रम्प हुंदे कन्नै मुलाकात मगरा Davos च विश्व आर्थिक मंच पर एह खबर सांझी कीती। ट्रम्प होंरे उंदी चर्चा गी सकारात्मक दस्सेया ते इस गल्ला उप्पर जोर भरेया जे लड़ाई पक्क गै खत्म होनी लोइचदी।

<><><><><><>

Basant Panchami

“बसंत पंचमी” ते “सरस्वती पूजा” दा त्योहार अज्ज समूलचे मुल्खै दे बक्ख-बक्ख हिस्सें च धार्मिक श्रद्धा ते परम्परागत तरीके कन्ने मनाया जा रदा ऐ। लोक ते खास तौरा उप्पर विद्यार्थी इस मौके उप्पर बुद्धि ते ज्ञान दी देवी मां सरस्वती हुंदी पूजा करदे न। एह त्योहार बसंत बहार दे शुरु होने दा त्योहार ऐ जेहड़ा नमीं शुरुआत ते कुदरती खूबसूरती गी मनाने दा समा ऐ।

<><><><><><>

SC-Prayers

सर्वोच्च अदालतै मध्य प्रदेश दे धार जिले दी विवाद आहली भोजशाला-कमल मौला मसीतै च अज्ज बसंत-पंचमी दे मौके पर हिंदू समुदाय गी सूर्योदय थमां लेइयै सूरज गूब होने तगर पूजा-पाठ करने दी इजाजत दिती ऐ जिसले कि मुसलमानें गी दपैहरी 1 बजे शा 3 बजे तोड़ी नमाज अदा करने दी इजाजत दिती गई ऐ। सुप्रीम कोर्ट नै आखेआ ऐ जे नमाज अदा करने लेई औने आहले मुस्लिम समुदाय दे लोकें दी सूचि जिला प्रशासन गी दिती जा। प्रधान न्याधीश न्यामूर्ति सूर्यकांत, जाँयमाले बागची ते विपुल एम. पंचौली हुंदी पीठे दौनें पखे गी सद्भाव बनाई रखने लेई आखेआ। इस दरान कन्नू बवस्था बकरार रखने लेई राज्य ते जिला प्रशासन दे कन्ने सहयोग करने दी अपील बी कीती गई ऐ। अदालतै जिला प्रशासन गी प्रार्थना स्थल पर सुरक्षा बवस्था यकीनी बनाने दा निर्देश दिता ऐ। एहदे शा पैहले दौनें पखे भोजशाला परिसर च धार्मिक गतिविधिये आस्तै इजाजत मंगी ही। ध्यानजोग ऐ जे हिंदू समुदाय भोजशाला गी बागदेवी दा मंदर मनदा ऐ जिनेगी देवी सरस्वती दे रूपे च बी जानेआ जंदा ऐ जिसले कि मुस्लिम समुदाय इस थाह गी कमलमौला मसीत आखदा ऐ। एह भारती पुरातत्व सर्वेक्षण आसेआ संरक्षित 11मीं सदी दा स्मारक ऐ। 7 अप्रैल सन 2003 गी होए दे इक समझौते मुजब हिंदू श्रद्धालु हर मंगलवारें इस परिसर च पूजा करदे न ते मुसलमान शुक्रवारें उत्थे नमाज पढ़दे न।

<><><><><><>

Tourism Dept. FITUR

जम्मू-कश्मीर सैलसफा मैहकमा 21 थमां 25 जनवरी तक्कर Spain दे Madrid च आयोजित चला रदे दुनिया दे सारें शा बड्डे सैलसफा बपार मेले “FITUR-2026” च हिस्सा लै रदा ऐ। मैहकमा इस क्षेत्र दी विशाल सैलसफा क्षमता गी वैश्विक मंच उप्पर प्रदर्शित करा रदा ऐ ते आगुंतकें ते मुख्ख हितधारकें कन्नै गल्लबात करा रदा ऐ- जेहदे च मुख्ख सैलसफा थाहरें- निवेश दे मौकें ते केन्द्र शासत प्रदेश दी निवेश-नीतियें गी उजागर कीता जा रदा ऐ। इस आयोजन च हिस्सा लैने दा मकसद जम्मू-कश्मीर गी इक पसंदीदा सैलसफा ते निवेश थाहर दे तौरा पर उप्पर बढ़ावा देना ऐ। 156 मुल्खें थमां ढाई लक्ख शा मते पेशेवर इस च शामिल न। एह मेला जम्मू-कश्मीर गी वैश्विक नजरिया ते अंतराष्ट्रीय सांझेदारी गी बढ़ावा देने लेई इक बड्डा मंच पेश करा रदा ऐ।

<><><><><><>

KITG-Trials

जम्मू-कश्मीर खेड्ड परिषद- छत्तीसगढ़ च होने आहले “खेलो इंडिया ट्राईबल गेम्स- 2026” लेई जम्मू कश्मीर दे दल आस्तै चयन लेई अज्जै थमां पैहले चरण दे ताल परीक्षण शुरु करोग। चयन प्रक्रिया अज्जै थमां फुटबाल दे खडारियें लेई मिनी स्टेडियम परेड ग्राउंड जम्मू च ते एथलैटिक्स लेई 24 जनवरी गी जम्मू युनिवर्सिटी च कीती जा रदी ऐ। हॉकी ते Weightlifting लेई चयन कल बी के.के. हक्कू स्टेडियम ते जम्मू युनिवर्सिटी च कीते जागंन। प्रतिभागियें गी परीक्षण प्रक्रिया दे समें अपने कन्नै Domicile –Tribal Community Certificate ते आधार कार्ड लेइयै आना लोडचदा ऐ।

<><><><><><>

India Weather

भारती मौसम विभाग नै अज्ज जम्मू-कश्मीर- लद्दाख- हिमाचल प्रदेश- गिलगित- बलतिस्तान- मुजफ्फराबाद- पंजाब ते उत्तराखंड च भारी बरखा दे कन्नै ऐन-गड़ा पौने- अंधी-झक्खड़ झुलने ते शमानी बिजली लिशकने दी भविक्खवाणी कीती ऐ।

मौसम विभाग नै दिल्ली- हरियाणा- चंडीगढ़- राजस्थान ते पच्छमी ते पूर्वी उत्तर प्रदेश च बी बरखा ते ऐन पौने ते तेज ब्हा चलने दे असार जताए दे न। तौंआई जम्मू च कल रातीं थमां गै तेज बरखा बरा करदी ऐ ते खिते दे उच्चे पहाड़ी इलाकें च बर्फबारी होई ऐ।

<><><><><><>